

5,000 anak pokok buah-buahan dijual pada ekspo UPM

SERDANG - Klon anak pokok durian antara kira-kira 5,000 anak pokok buah-buahan yang dijual pada Ekspo Pertanian dan Pesta Konvokesyen Universiti Putra Malaysia (UPM) di Bukit Ekspo universiti itu di sini bermula semalam hingga Rabu depan.

Naib Canselor UPM, Prof. Datin Paduka Aini Ideris berkata, antara anak pokok durian yang dijual pada harga bermula RM10 sebatang ialah jenis klon D24, D99 (kop kecil), D168 (hajah hasmah), D197 (raja kunyit) dan musang king.

“Seperti tahun sebelumnya, permintaan terhadap anak

pokok durian klon jenis musang king dan hajah hasmah sentiasa dicari oleh pengunjung,” katanya kepada pemberita selepas Majlis Perasmian Ekspo Pertanian dan Pesta Konvokesyen UPM ke-40 di sini semalam.

Hadir sama Ketua Setiausaha Kementerian Pertanian dan Industri Asas Tani, Datuk Seri Ismail Bakar.

Aini memberitahu, anak pokok rambutan daripada jenis R191, anak pokok mangga (MA224 cok anan), anak pokok nangka (J33) dan anak pokok jambu batu (GU15) juga dijual pada ekspo berkenaan yang bermula dari pukul 10 pagi hingga 10 malam.

“Anak-anak pokok yang ditawarkan memiliki sijil Skim Pengesahan Bahan Tanaman yang memperakukan anak benih klon keluaran UPM adalahjamin dari segi ketulenan baka serta kualiti yang memenuhi standard Jabatan Pertanian,” ujarnya.

Selain anak pokok buah-buahan, ekspo berkenaan turut menawarkan 2,000 batang pokok orkid pelbagai jenis dan spesies yang dijual pada harga bermula RM15 hingga RM50.

Antara spesies unik pokok orkid yang dijual ialah *Phalaenopsis Sp*, *Vanda Sp*, *Arachnis Sp*, *Dendrobium Sp*, *Cattleya* dan *Oncidium Sp*.



ISMAIL (kanan) melawat pameran pada Majlis Perasmian Ekspo Pertanian dan Pesta Konvokesyen UPM ke-40 di Serdang semalam.